

## Pol-ate kaapiya tu yuuh la vu Timoti

<sup>1</sup> + o 1:1 Ep 1:1\*Sa Pol, ond Anutu yoo ka vu be Yesu Kalisi holin sa be saatu sinaale, in nambe sa naanêel Anutu-te vakasin sen jôôy-ato langaah naambe yiyi naatu Yesu Kalisi-te hil, le mem Anutu le bu metumin vu yiyi.

<sup>2</sup> + o 1:2 1Ti 1:2\*Sate Timoti daka-e, sa kaavu kaapiyaa-jo laas vu hong. Aamangg Anutu yuuh yate Omaaho Bop Yesu Kalisi lambiing samu samu osin ka pasiv naas mando gaving hong-ambe galompayo nanjip melaas

### *Yanigg-ame naamum in banye nivasa le*

<sup>3</sup> + o 1:3 Pil 3:5; Sin 23:1; 24:16\*Sa naalohak la vu Anutu sen sa navu sapa hôok vaha osin sa longgpayo nikaapiik-ato, yik nambe sen sa bungg-aso sapa hôok bôôy-ato, ond sa kangg navu hong hôok lohakin langaah-ande busin-ambe sa naapêelis la vu Anutu. <sup>4</sup> Tonde sa kangg vu sen gamem luk kaasêeh-ato, om sa naawiingin nambe anaas aangge hong jesin naah-ambe mem sa kangg vasa dôok. <sup>5</sup> + o 1:5 Sin 16:1\*In sa kangg vu nambe gawii-having osin galompayo timu nambe sen bumaavêeh Lois-ande tam Yunis-ato, tombe yik sa lak ni vanuh nambe gawii-having nambêênju having, <sup>6</sup> + o 1:6 1Ti 4:14\*ondeey saawiingin nambe aambêel gakam ak in gakam bu Anutu-te niwêek kul-ate sen bôôy sa hambe

namangg ak galum-ambe lukalaas galompayôô-to. Om gêên-anjo gambiing kul ak Anutu-te niwêêk-anja be naatu bopaata jak, naambe sen hil dave hôök kin-ambe natum bopaataa-to. <sup>7</sup> + o 1:7 Lom 8:15\*In Anutu vu Vavi Vaambuung vu yiyi ond me-nawiing in nambe yaanjêênin e, nganjo navu niwêêk vu yiyi, osin nawiing in nambe yahengg gaving omaahonôôn-ambe yiyi oo anjakin yiyi nivasa mu.

<sup>8</sup> + o 1:8 Lom 1:16\*Game ganjêênin hil-ambe gambun yate Omaaho Bop-ate vakasin e, nganjo goo naanêêl langaah. Tonde yik game ganjêênin hil-ambe onaatu kam in yite omaaho kalaambus sa le, malis, yik goo gako niwêêk vu Anutu be ombaaku nimeen in onaanêêl yite banye nivasa gaving sa. <sup>9</sup> + o 1:9 Ep 2:8-9; Tit 3:5\*In Anutu hako yiyi lom-ambe teey yiyi in nambe yiyi naatu yite hil amu, lemu me-ka vu yate kul anivasa sen yiyi naawiing ondeey teey yiyi e, malis, nganjo yoo ka vu be wiing samu samu vu yiyi nyemalis amu. Anutu me-hatung ngaanggis e de yoo wiing samu samuu-jo vu yiyi hôök Yesu Kalisi munggin-ambe neep. <sup>10</sup> + o 1:10 1Ko 15:55-57; Hiblu 2:14\*Tombe mem gêên Yesu Kalisi, omaaho sen hako yiyi lom-ato, tok laam langaah lung la, tombe Anutu taato yite samu samu sen vu vu yiyi ak Kalisii-to neep langaah. In Yesu Kalisi laanggôôl yimbin-ate niwêêk, de yite banye nivasa vêêl metumin sen yiyi mando danggataa-to laam langaah. <sup>11</sup> + o 1:11 1Ti 2:7\*Yik yii-ju yoo hatung sa be saatu sinaale osin kaputung in nambe sa naanêêl banye nivasa langaah, <sup>12</sup> ondeey soo naaku nimeen. Lemu

sa ningg-ame namum in e, malis, in soo alak omaaho sen saawii-having yii-jo ni lung la, tombe saawii-having vulôôt nambe yoo le ganggin yite kul ayuuh ame sen vu lukala sa namangg-anjo nivasa lôôt-ambe naatok na balup busin sen nom-ato.

<sup>13</sup> + o 1:13 1Ti 4:6; 6:3; Tit 1:9; 2:1\*Om vakasin nivasa sen sa taahu hong hôök-ato ond yik osapa hôök, de goo gambiing gaving Yesu Kalisi niwêék-ambe gahem gaving yi, in gatu yite va lung laa-to. <sup>14</sup> + o 1:14 1Ti 6:20\*Om goo naalum in va nivasa sen Anutu vu lukala onamam-ato be ongganggin nivasa, tonde Vavi Vaambuung sen nando hôök yalonggpayôô-to ond yoo le dôôvu hong in kul-anjo.

<sup>15</sup> + o 1:15 2Ti 4:16\*Galak ni nambe hil pin vu Esia, de Piselas ayuuh Hemosenis having, ond sil laluuu damind vu sa. <sup>16</sup> Om sa naalohak in nambe Omaaho Bop aka pasiv in Onesipolas gaving vane be noondin, in busin ngeeyaata ond Onesipolas laam nayi sa be navu samu sa longgpayo, de me-nayêênin hil-ambe natu ka in sa in sen sa naaluus kalaambus-anjo le, malis. <sup>17</sup> Nganjo naahen valup Lom atombe yoo salo sa pavis-ambe mem tovu sa, <sup>18</sup> + o 1:18 Jut 21\*om Omaaho Bop aka pasiv in yi hôök busin taamusin sen nom-ato. In Onesipolas-anjo ond yoo hôôvu sa balon ngeeyaata vu Epesas-ambe goo galak ni vanuh-ato.

## 2

*Onaatu Yesu Kalisi-te omaaho vaavis anivasa*

<sup>1</sup> Noongg-e, onggako niwêêk vu Yesu Kalisi-te samu samu sen navu vu yiy-ato be onaatu omaaho niwêêk jak. <sup>2</sup> De vakasin sen ohango saanêel hôök hil ngeeyaata mend-ato, ond yik otaahu vu hil anivasa vaalu sen sil lalohvu nambe taahu hil ango dôök-ato.

<sup>3</sup> + o 2:3 2Ti 1:8; 4:5\*Ke, om goo naatu Yesu Kalisi-te omaaho vaavis anivasa, be ombaaku nimeen gaving hey vaalu. <sup>4</sup> In vaavis-aso dala ngaamong ond me-dawiiing kul vaalu having e, malis, yik yoo dala ngaamong timu in nambe silate yêêv lanji sil-ambe ahend anivasa vu sil. <sup>5</sup> + o 2:5 2Ti 4:8\*Tonde omaaho ti gatup-ambe kaluuh ango-so, ond yoo gatup-ambe sapa hôök mopaatôôv hatupin nivalok, le naambe nama ond me-le gako nôôn anivasa ti le. <sup>6</sup> + o 2:6 1Ko 9:7,10\*Tonde omaaho sen nawiing kul bopaata be naalôôh vanôôn-ato, ond yoo gako yite vanôôn nôôn vaalu sen nasupin-ato naamunggin hil vaalu pin, ond mem lohvu. <sup>7</sup> Om gakam oo bu vakasin sen sa naanêel-anjo, le mem Omaaho Bop e tatekin vu hong-ambe mem ganjak vakasin pin-anjo danggakook ani.

<sup>8</sup> + o 2:8 1Ko 15:4,20; Lom 1:3\*Ke, om gakam oo bu Yesu Kalisi sen yite danggakook neep vu Devit-ato, ond yimb-ambe kandi lak laah, lohvu sen sa naanêel hôök banye nivasaa-to. <sup>9</sup> + o 2:9 Ep 3:1; Pil 1:12-14\*Tombe yik sa naanêel banye nivasaa-jo ondeey sa naaku nimeen-ambe sil landuuh sa lohvu omaaho nipaya ti, lemu me-landuuh Anutu-te vakasin e. <sup>10</sup> + o 2:10 Ep 3:13; Kol 1:24\*Om sa longgpaya yoo niwêêk-ambe sa naaku nimeen pin-anjo in nambe saandôôvu hil sen

Anutu yoo holin sil in nambe daatu yite hil-ato, tonde mem Yesu Kalisi gako sil naah vu Anutu be sil mando hôôk yite nikaapulis danggata osin danggata.

<sup>11</sup> + o 2:11 2Ko 4:11\*Om yik vakasin-anjo keen lôôt nambe,

“Yaavu yiiy la osin doos in nambe yaanggimb ak Kalisi haale, ond mem yale mando metu-min gaving yi. <sup>12</sup> + o 2:12 Mat 10:33\*Om naambe yiiy baale niwêêk-ambe baaku nimeen pin, ond yik yale naatu lulemak gaving yi, le naambe yiiy naatu kangg in yi, ond yik le naatu ka in yiiy gaving. <sup>13</sup> + o 2:13 Lom 3:3-4; Nam 23:19; Tit 1:2\*De yiiy naanêel naambe yamengg navu sapa yi, le ma de yiiy gavuuuh yi na, nganjok yoo navu sapa hôôk yite vakasin amu, de me-lohvu nambe kaange yite vakasin-anju le, malis lôôt.”

*Onaatu Anutu-te kul vaha nivasa ti keen in nambe ji hong nivasa*

<sup>14</sup> + o 2:14 1Ti 6:4; Tit 3:9\*Gambêel hil alund jak in vakasin-anjo, be gambu kôôvu sil ak Anutu haale naambe sil-ame mahôôh sil lôôt in vakasin vaalu le, in vakasin mahôôsin ond me-lohvu nambe dôôvu omaaho ti le, malis, nganjo nawing nipaya vu hil sen dando dangoyin-ato mu.

<sup>15</sup> + o 2:15 1Ti 4:6; Tit 2:7-8\*Om goo gambiing kul aniwêêk in nambe mem Anutu ji hong nivasa naambe gatu kul vaha nivasa ti keen-ambe onanêel yite vakasin keen-ato nivalok, de ganim-ame namum in e. <sup>16</sup> + o 2:16 1Ti 4:7\*Tonde goo ganoh nanye in vakasin mali-malis vaha vaha sen

nôôn maa-to, in vakasin mali-malis nambêênjo ond le naanggiy hil-ambe mem landukana mop sen galuuh damind vu Anutuu-to. <sup>17</sup> + o 2:17 1Ti 1:20\*Tombe silate vakasin mali-malis-anju lohvu payêês bopaata sen naya hôôk omaahonôôn vahand in naatu bopaata jak lôôt-ambe la nalohvu omaahonôôn pin. Ke, hil-anju silate omaaho yuuh ond Haimenias ayuuh Pailitas. <sup>18</sup> Hil-anju ond daloh paya in vakasin keen-ato om danêêl nambe yiyi kandi lak lung la de yame le kandi jak naah vu taamusin e. Ke, danêêl nambêênjo tombe nawiing nindanjeen vu hil vaalu sen lawii-having vakasin keen-ato.

<sup>19</sup> + o 2:19 Nam 16:5,26; Jon 10:14; 1Ko 8:3; Ais 52:11\*Lemu Anutu-te hil bel-ate ond sil lalohvu ngaandiin aniwêêk sen Anutu haav-ambe naale lung laa-to, tombe ngaandiin-anju kaavu vakasin neep ak nambe, “Omaaho Bop yoo lak yite hil anind.” Tonde ango neep having nambe, “Hil pin sen danêêl nambe Omaaho Bop-ate hil sil-ato ond sil oo galuuh damind vu va nipaya.”

<sup>20</sup> + o 2:20 1Ko 3:12\*In bayêên bop ti ond dêêngg ayuuh kaambum nando hôôk, tonde vaalu ond sil samu lak gool osin siliva, de vaalu ond sil lasap haah, tonde sil langgi heey ak ngaanggis, tombe vaalu ond kul anivasa-te, de vaaluk kul mali-malis-ate. <sup>21</sup> + o 2:21 2Ti 3:17\*Om naambe omaaho ti galuuh dami vu hil-anju osin silate vakasin tatuhin de mando nivasa, ond le mando naambe kaambum sen kul anivasa keen-atêêto, in tu vaambuung-ambe nando in nambe yite omaaho bop biing kul anivasa pin jak yi.

<sup>22</sup> + o 2:22 1Ti 6:11\*Om goo napak in kakook

anipaya sen nalup maanggêêm-aso londpayôô-to, tonde goo mosapa hôôk va nivalok osin gambi-  
ing gaving, de gahem gaving hil osin galompayo  
naalum melaas gaving hil sen londpayo la vu  
Omaaho Bop timu be lavand nahôôk yii-to. <sup>23</sup> + o  
2:23 1Ti 4:7\* Tonde onggaluuh damim vu vakasin  
sen nôôn ma be hil sen lundkook ma danêel  
sil in-ato, in galak ni nambe vakasin nambêênja  
natu ngaamong vu hil. <sup>24</sup> + o 2:24 1Ti 3:3; Tit  
1:7\* De Omaaho Bop-ate kul vaha-so ond ti me-  
mahôôh hil in vakasin e, nganjo yoo biing va  
melaas amu vu hil pin, yik yoo taahu hil hôôk  
va nivasa mu, de me-ahekalin-ambe bu dôôk hil-  
ate nipaya sen lawiing yi payaa-to nyevahaan e.  
<sup>25</sup> + o 2:25 1Ti 2:4\* De naanêel kaléêsin ambu-  
so ond naanêel sil osin melaas. Ke, mak biing  
naambêênjo ond Anutu le dôôvu sil, tombe sil  
langgilin sil alondpayo be mem lanjak vakasin  
keen ani. <sup>26</sup> In bôôy ond Saalang hako sil hôôk  
yite govak in nambe sil oo monggatung nanyend  
in Saalang lava, le naambe lanjak vakasin keen  
ani, ond sil alundkook e biing kul anivasa jesin  
naah atombe mem sil gavuuuh Saalang-ate govak  
na.

### 3

*Busin ahus ond va nipaya ngeeyaata le naatok  
naam*

<sup>1</sup> + o 3:1 1Ti 4:1\* Goo ganjak vakasin-anjo  
ni naambe vu busin taamusin ond nimeen  
ngeeyaata lôôt e naatok naam. <sup>2</sup> + o 3:2 Lom  
1:29-31\* Tombe omaaho ti ti ahe yoo le gaving yi,  
tonde ahend e gaving mone lôôt, tombe sil oo le

gako sil haalend jak, osin sil gatee sil jak danjeen-ambe daanêel hil pale, de sil e kalêêh maandin ayuuh taandin lavand. Sil-ame le daapêêlis vu hil sen davu samu sil-ato le, nganjo sil e lanji va nivasa yuuh ame naambe va malis. <sup>3</sup> Sil ahend-ame le gaving halindin-aso noondin-aso daka le, de sil ahend-ame le naakuuh daka le, malis, yik sil e daanêel vakasin anipaya jak hil noh nanye, tonde sil-ame lalohvu nambe me-le lanjakin sil daka le, nganjo yoo le lambiing navu dees vu hil lôôt, osin le lanji va nivasa pin paya. <sup>4</sup> Tonde le lambu halindin landukana vaavis namand in nambe lanyiis, de pavis atombe sil lambiing va nindanjeen, tonde sil e gatee sil jak naambe sil bop, osin ahend oo le gaving liiy vaha vaha voonate, de ahend-ame le gaving Anutu daka le. <sup>5</sup> + o 3:5 Mat 7:15,21; Lom 2:19-20; Tit 1:16\*Sil e kaasiy sil naavind ak Anutu-te vakasin malis amu, lemu sil-ame lawii-having yite niwêêk e. Hil-anja ond goo ganoh nanye in sil.

<sup>6</sup> + o 3:6 Tit 1:11\*Hil-anja sil vaalu dasengg-ambe dalakala bayêên vu vêêh sen lundkook maa-to be dalu sil nalund ak vakasin tatuhin. Vêêh-asôônju ond va nipaya ngeeyaata nawiing-ambe sil alondpayo nimeen, tombe kakook vaha vaha naanjiihin sil having. <sup>7</sup> + o 3:7 2Ti 2:25\*Vêêh-asôônju yoo mondango vakasin amu, lemu sil-ame lalohvu nambe lanjak vakasin keen ani le. <sup>8</sup> + o 3:8 Eks 7:11,22; 1Ti 6:5\*Bôôy ond Janis ayuuh Jamblis dawiiingin nambe daanggôôl Mose, om yik hil sen-anja ond dawiiingin nambe daanggôôl vakasin keen. Sil alundkook la paya lung la, tonde sil-ame lalohvu vakasin keen sen yaawii-having-



ato daka le, malis lôôt. <sup>9</sup> Lemu hil ngeeyaata mele lambiing gaving sil e, malis. Yik hil pin e lanji hil-anju dawiing va osin lundkook ma, naambe sen bôôy hil layi Janis ayuuh Jamblis lawiing va osin yuuh alundkook maa-to.

*Gamem oo sapa Anutu-te vakasin*

<sup>10</sup> Lemu hong ond gahem having sa be galak sate vakasin ani sen sa navu tatekin vu hil-anjuuto lung la, osin va pin sen sa naawiing-ato, tonde mopaatôôv sen sa navu sapaa-to, osin va sen soo aawii-having Anutu niwêêk-ato, tombe same ahekalin pavi-pavis e, nganjo soo naawiing kul vu hil lôôt. Tonde galak sa ningg nambe sa-hengg oo naving hil osin soo naale niwêêk-ambe naaku nimeen. <sup>11</sup> + o 3:11 Sin 13:50; 14:5,19; Saam 34:19\*Tonde va nindanjeen pin sen hil dawiing vu sa osin nimeen pin sen tovu saa-to, tonde va sen tovu sa neep Antiok-ande Ikoniam osin vu Listlaa-to ond yik galak ni nambe hil lawiing nindanjeen vu sa lôôt vuu-ju, lemu Omaaho Bop oo lôôh sa vêel in nimeen pin-anju. <sup>12</sup> + o 3:12 Mat 16:24; Jon 15:20; Sin 14:22\*Keen, hil pin sen lawiingin nambe lanjalak Yesu Kalisi

be lambiing va sapa Anutu kaa-to, ond omaa-honôn e lambiing nindanjeen vu sil. <sup>13</sup> Tonde hil anipaya osin tatuhin ambu-so le tatuhin hil, de sim Saalang oo

le tatuhin hil anipaya-sônju, tombe mem sil pin daatu hil anipaya valok-ate.

<sup>14</sup> + o 3:14 2Ti 2:2\*Lemu hong ond gamem oo sapa vakasin sen ohango be gawii-having niwêêk-ato, in hey sen hey taahu hong-ato ond

galak hey aningg lung la. <sup>15</sup> + o 3:15 Jon 5:39\*Tonde galak ni having nambe hôôy sen goo naahen unoopasiv-ato, ond goo monangoyin vakasin hôôk Anutu-te kaapiya be galak ni, tombe kaapiyaa-ju lohvu nambe naanggiy hong-ambe onaatokak mopaatôôv sen galompayo na timu vu Yesu Kalisi in nambe mem Anutu gako hong naah vu yii-to.

<sup>16</sup> + o 3:16 Lom 15:4; 2Pi 1:21\*Yik Anutu-te vakasin pin sen lukaneep kaapiyaa-to ond Anutu yoo vu vu hil-ambe sil kaavu, tombe vakasin-anjo ond nivasa lôôt in nambe tatekin vakasin keen vu yiyi, tonde taato yate va nipaya vu yiyi, osin

naanggiy yiyi dukanaah Anutu-te mop, tonde taahu yiyi hôôk va nivalok. <sup>17</sup> + o 3:17 2Ti 2:21\*Om mem yiyi sen yaatu Anutu-te hil-ato, ond yiyi oo aatu hil aniwêêk lung la be yaalohvu lôôt in nambe yaambiing kul anivasa pin.

## 4

*Goo naanêêl Anutu-te vakasin keen-ato niwêêk lôôt*

<sup>1</sup> + o 4:1 Sin 10:42; Lom 14:9-10\*Yesu Kalisi le gangoyin hil sen dando memoos osin hil sen layimb-ato silate vakasin pin. Yesu Kalisii-ju le naatok naam hil pin amend-ambe mem naatu omaaho lulemak-ambe ganggin yite va pin mando danggata osin danggata. Om sa naanêêl niwêêk vu hong jak Anutu yuuh Yesu Kalisii-ju haalend naambe <sup>2</sup> + o 4:2 Sin 20:20,31\*goo monaanêêl yite tanasin langaah. Naambe hil lawiingin nambe gangoyin ond onaanêêl, le naambe me-lawiingin nambe gangoyin e, lemu

yik goo monaanêel Yesu Kalisi-te vakasin lôôt. Goo naanêel lôôt in nambe lambiing gaving, osin gambu kôôvu hil in nambe vakasin galu sil alondpayo be langgilin sil, tonde okaandu hil ak vakasin gaving. De game ganitambo osin game gahekalin e, nganjo goo gambiing kul-anjo vu hil lôôt osin otaahu sil nivasa.

<sup>3</sup> + o 4:3 1Ti 4:1; 2Ti 1:13\*Angge, vu taamusin ond hil-ame le gambe nanyend in vakasin anivasa keen-ato daka le, malis, yik sil nanyend e biing navu navu in nambe sil gango vakasin heey, tombe sil e langgolin silate kaputung heey in taahu sil hôök va vaalu sen dawiiingin-ato. <sup>4</sup> + o 4:4 1Ti 4:7\*Tombe mem sil galuuh damind vu vakasin keen-ande gatung nanyend in vakasin vaha vaha mali-malis. <sup>5</sup> Lemu hong ond nohvu busin pin galumkook oo biing kul anivasa, goo baaku nimeen-ambe onaanêel banye nivasa vu hil. Tonde yik kul pin sen Anutu vu vu hong-ato, ond goo gambiing keen lôôt.

*Pol nêel nambe ngaaho lak in yite kul navu jung na*

<sup>6</sup> + o 4:6 Pil 2:17\*Gêên saatu salivangin vu Anutu nambe sen hil datooy wain natu salivangin vu Anutuu-to. In busin sen sa navu gavuuuh kul-ande sana lak-ato ngaaho lak lung la. <sup>7</sup> + o 4:7 1Ti 6:12\*In soo monatup niwêêk lôôt-ambe mem gêên saatok valup nalu daambuu-to lung la. Yik soo aawii-having niwêêk. <sup>8</sup> + o 4:8 1Ko 9:24-25; Taato 2:10\*Gêên Omaaho Bop hatung nôôn anivasa sen hil anivalok-atêêto be nando nanggin sa, in yi omaaho sen yoo nangoyin vakasin-ambe nanêel nivalok, tombe busin-anju ond yoo le bu

nôôn anivasaa-ju vu sa, lemu me-yoo le bu vu soo timu le, nganjo le bu vu hil pin sen ahend having nambe lanji yi dôök busin sen naatok naam langaah-ato.

*Vakasin ahus heey*

<sup>9</sup> + o 4:9 2Ti 1:4\*Yik goo kandi be ganaam vu sa pavis,

<sup>10</sup> + o 4:10 Kol 4:14; Tit 1:4\*in Demas havuuh sa de la Tesalonika in ahe yoo naving va voon-ate, tonde Klesens la Galata, de Titus la Dalmesia. <sup>11</sup> + o 4:11 Kol 4:14; Sin 15:37-39\*Tonde yik Luk nôôn timu yoo nando having sa, om onggako Maak gaving hong-ambe manaam ond mem nivasa in nambe dôôvu sa in kul. <sup>12</sup> + o 4:12 Ep 6:21-22\*Saawiing Tikikas la Epesas lung la.

<sup>13</sup> + o 4:13 Sin 20:6\*Ke, om ganaam ond onggako sate lolop diin sen sa havuuh nando Kapas ambaan vu Toloas-ato be onggako kaapiya gaving. Tonde kaapiya vaalu sen sil samu lak bik naavii-to ond manyinja goo gako naam keen.

<sup>14</sup> + o 4:14 1Ti 1:20; Saam 62:12; Pro 24:12; Lom 2:6\*De Aleksanda sen nawiing kul in nasi kaapaa-to ond wiing sa paya lôôt, om sim taamusin e Omaaho Bop e bu yite nipaya nyevahaan dukanaah va sen wiing-ato. <sup>15</sup> Om yik goo ganggin hong in omaahôô-ju, in yoo naanggôôl heyate vakasin lôôt.

<sup>16</sup> + o 4:16 2Ti 1:15\*Tombe nyendoos ond soo timu be saanêêl vakasin laah vu hil sen dango sate vakasin-ato, de omaaho ti me-naale having sa be hôôvu sa le, malis, hil pin lavuuh sa, om saalohak in nambe Anutu me-ka bu silate nipayaa-ju le. <sup>17</sup> + o 4:17 Sin 23:11; 27:23; Dan

6:22\*Lemu sak, Omaaho Bop kaandu sa be vu niwêêk vu sa, ondeey soo aanêêl Kalisi-te vakasin lohvu lôôt vu hil sen dango sate vakasin-ato, be hil alundoos pin langoyin. Tonde Anutu yoo lôôh sa vêêl in omaaho nipaya

nama. <sup>18</sup> Tonde yik Omaaho Bop yoo le nôôh sa vêêl in va nipaya pin sen hil dawiiingin nambe lambiing vu saa-to, de yoo le ganggin sa be gako sa naah baan baandoni. Ond yik Omaaho Bop-anju yite nikaapulic naatu bopaata lôôt-ambe nanjip danggata osin danggata. Keen.

<sup>19</sup> + o 4:19 Sin 18:2; 2Ti 1:16-17\*Ke, de onaanêêl vu Pliska yuuh laya Akwila, tonde vu Onesipolas-aso yite hil gaving naambe sa kangg navu sil. <sup>20</sup> + o 4:20 Sin 19:22; 20:4\*De Elastas ond haay hato Kolint atombe naahen nandôô-ju, tonde Tolopimas ond nilak om nando Mailitas-ande sa laam. <sup>21</sup> Om okandi be ganaam pavis, de game mongganggin busin sen vavi osin lôôy anipayaa-to le. Ke, Yubulas ayuuh Pudens-ande Lainas ayuuh vêêh bop Klodia, tonde yik Yesu-te hil pin having ond kand navu hong.

<sup>22</sup> Yik vakasin lung laa-ja. Omaaho Bop mando gaving okanum, de yite samu samu naas mando gaving ham pin.

**Mangga Buang New Testament**  
**The New Testament in the Buang, Mangga Language of**  
**Papua New Guinea**  
**Nupela Testamen long tokples Mangga Buang long**  
**Niugini**

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 3 Mar 2023 from source files dated 9 Oct 2020

8d739032-2a4b-567d-abd1-cb7e24ed2cd6